



GIUSEPPE CABIZZOSU

BIBLIOTECA

www.giuseppcabizzosu.it

Sebastiano Bosu

“Pace”

(Ottana 1918 - Macomer 1990)

Poesie scelte in lingua sarda



GIUSEPPE CABIZZOSU

BIBLIOTECA

www.giuseppecabizzosu.it

Sebastiano Bosu “Pace”

(Ottana 1918 – Macomer 1990)

Poesie scelte
in lingua sarda



GIUSEPPE CABIZZOSU

BIBLIOTECA

www.giusepecabizzosu.it

Sebastiano Bosu “Pace”

(Ottana 1918 – Macomer 1990)

Nato a Ottana il 21/01/1918, fu agricoltore ed elettricista. Poeta estemporaneo scrisse nella maturità versi in rima e sciolti. Morì a Macomer il 18/06/1990.

Baddes Amadas

Baddes, amadas baddes, terra mia,
mudadas de padentes e granitos,
ue zelidos bentos e biddia
daen ebbia traschias e fritos,
ue sas umbras de sa pitzinnia
si che cuan a sero intro sos littos
isparinde che nues passizzeras
si che lean amentos e isperas.

Baddes chi dadu m'hades una vida
da sas intragnas d'una mamma amada,
chi pro chi sonniende mi la ida
resto disisperadu a s'ischidada,
ca no mi faghes pius de guida
comente in s'edade immaculada,
a cando fias bramosa e cuntenta
mustrendemi su mundu a manu tenta.

Su chi m'haias mustradu a pitzinnu
hat cambiadu in bestes su colore,
da cando no mi das pius carinnu
est astragadu su chi fit calore,
su durche sonnu cantadu in su ninnu
dae te mamma cun immensu amore
appenas chi m'ischido mi lu abizzo
chi no happo pius su chi disizzo.

Como ses in su mundu 'e sos biados
dae su die ch'ispiccadu has bolu,
pregadora in sos chelos arghentados
pro me chi so restadu tristu e solu
in custu logu a piangher peccados
ue nessunu nd'hat pena ne dolu
de me, chi senza amore ne amigos,
resto solu a piangher sos castigos.

Intro su coro sos tempos lontanos
los collo pro ammentu e mi los ghiro,
a forte los istringo cun sas manos
e cun oios infustos los ammiro
in custas baddes caras e pianos
chirco cun s'isperanzia e suspiro
ma non perdonat su tempus dannarzu
est a chircare un'agu in su pazzarzu.

Bentu de sole

Bentu chi punghes in sa carre sana,
astragas tottu, s'adde e-i s'altura,
isbuffas che tentorzu in domadura,
malignu peus de sa tramontana.

Finas sa luna, arcada che pudatta,
si che cuat in palas de una nue,
chirchende appoggiu, cando sulas tue
est de su frittu lughida che pratta.

Ghelas e das nieddu s'astragore,
ses che ghespe terranzu furiosu,
distrues cantu b'hada e ses dannosu
cando sas gemmas isboccian fiore.

Dae sa tana su notte s'aresta
essit e in su buscu si che offuscada,
chirchende in sa malesa su chi buscada
in carestia est bonu su chi b'este.

Sende in sa corcadorza, su pastore
los bidet isparinde sos isteddos,
tando su cantu de sos puzoneddos
annunziat su die a primu albore.

Belidos lamentosos de un'anzone
s'intendet dolorzosos che malandra,
intantu est ora de truvare a mandra
pro murgher pagu latte a su masone.

Sos boes giuntos cun su carru iffattu
faghen fragassu in buttueros pedrosos,
e cando agattan camminos fangosos
dàn passos lentos in su logu ingratu.

Chie los truvat andat in s'attonzu
pro coltivare pianos e serras,
cun s'isperanzia in sas lucrosas terras
sos granos d'oro intutat in s'aronzu.

Sa massaia ammadrigat sa farina
ma suighinde no li pesat pane,
ca sulas tue, lenvantinu cane,
guastas in sa mesa sa faina.

Tristu su rusignolu est attitende
dae mesu sas naes de su laru,
tott'arruffadu, chilchende riparu
cantat goi rimediu invochende:

"Chie travallat continu est traittu,
ca sos ungrudos dae su potere

pretendent dae tottus su dovere
ma non daen a nemmos su dirittu".

"Dae Jannarzu finas a nadale
benit e passat dogni annu in peus"
-supplicat goi a santos e a Deus-
"si no cambiat bentu andamus male".

Beranu

Cun avreschidas dulches e tramontos
germoglias baddes, montes e collinas,
beranu, cando frorin sos armuntos,
rundines, turtureddas piligrinas

faghen sos nidos in logos presuntos,
sos campos dana impreos e fainas,
beranu, domas sos boittos giuntos
e isseddas sas rudes calarinas.

Cando su sole abrundat sas ispigas
battis a cumprimentu sos laores,
tando nos das su fruttu in sas arzolas,

si est annada mala nos castigas,
si est bona de pane nos consolas
e nos pagas fadigas e sudores.

Cando est sero

Cando est sero, rintoccos d'armonia
s'intendene da su brunzu 'e sa campana,
paren giamende sa zente lontana
a poi de sas fadigas a chenare,
paren giamende coros a pregare
ca est sero, una santa Ave Maria.

In s'umbra 'e sa notte sos disizos
benin che-i su sonnu 'e sos pitzinnos,
tott'indorados de bellos disinnos
chi meritan de domo sos onores;
tando isparit sa notte in sos albores
lassende a su manzanu sos consizos.

Onzi consizu est sabiu e addottu,
cumpridu de ideas e profittos,
portadore 'e consolu a sos afflittos,
e donzi die ch'in sa lughe avreschede
cun tantu amore e passione creschede,
fidele a s'esistenza e devotu.

In dies bonas e in temporales,
a passu lentu che boe domadu,
presses hat e passenzias carradu
s'omine cun s'impreu 'e sos valores,
dende imparu che mastro a sos minores
in su caminu tortu 'e sos mortales.

Madurende su fruttu 'e sa bontade
in s'arbure onzi ramu est generosu
e istigat a s'omine orgogliosu,
ca est de natura pius ladinu
su donu 'e sas virtudes genuinu
de isperanzia, fide e caridade.

A poi de sos brunzos custa trumba
cando est sero l'intendo in su fundaghe,
paret chi siat giamende sa paghe
pro suspender su fogu in donzi fronte,
tando torrat bolende in s'orizzonte
cun su ramu 'e s'olia sa columba.

Isettende sa paghe

Bentos de gherra,
traschias malinnas
dannosas,
abbolotan sas bideas,
e truncan in su nascher
s'isperanzia
de chie fittianu
invanu pregada,
isetende sa paghe.
Dae su cherrer
de pagos cainos
ch'inchesu han sas lumeras
dae sas frammas alluttas,
inferru 'e tantos frades
chi pedini azutoriu,
dolidores de fertas e piaes
sos lamentos intendo.
Peleo e ligo a fasche
fiores e ispinas maleittas
pro istudare fogu.
Isettende sa paghe,
sas dies fuidittas
s'irghelan in s'iscuru,
che crabolas arestes,
cando est sero,
in su padente ispozu,
ue su frittu punghede
a su costadu
che unu Longinu,
fattende eterna sa notte
a passare.
Tando in brenugos prego
e canto cun s'ispera
chi s'ammuden sos bentos
e cando avreschet crasa
sos ojos de su mundu
pottan bidere
torrende in s'orizonte
lunghe de tanta paghe
a sos viventes.

Pensamentos

Pensamentos alados chi olades
peri sos montes, baddes e costeras
chi ligeris che nues passizzeras
bos chilcades apentos e disizos,
e cando a bolu agatades fastizos
in s'azudu 'e Deus isperades.

S'isperanzia a birde est colorida
profumada che murtas e lidones
inue faghen nidu sos puzones
chi zirulende viven in amores
godinde in s'istagione sos sapores,
su bene immensu chi daet sa vida.

Ue bundat su bene est sempre pasca
s'ispassat e si godit in pienu
sas dies renden s'umore serenu,
ma inue su bene est a misura
rennat sa povertade, s'isventura
e si navigat semper in burrasca.

E pensare chi tentu hamus in donu
dae su tempus festas e cuntentos
e a bortas sos males e turmentos
a su sero nos proan sa passenzia,
dandennos a pecadu penitenzia
e cando Deus cheret su perdonu.

Sa zente pro sos benes temporales
est avida, ischiava 'e s'interessu
e pro haer sos benes in possessu
s'han criadu rivaless a nemigos
e poi no accettan sos castigos
chi, pro los haer, han cumissu males.

Pro nois hat suffertu in su Calvariu
Deus signore pienu 'e bontade
simbulu de amore e povertade,
ma sa zente chi a benes est avesada
andat sempre infattu a sa ricchessa
non si cuntentat de su necessariu.

S'avreschida

A orettu 'e sa lughe, su manzanu
m'ischido a oriolu
e su tempus
mi daet a fiottu
fainas e promissas,
chi mi lassan
sididu e senza ispera,
che fumos de timanza
cando irghelana.
Sa terra assoliada,
inue sos dannados de sa vida
curren subra sas brasias alluttas
e de issos nessunu si nde dolet,
intendet s'abandonu,
a orettu 'e sa lughe
gai su tempus passat,
e lassat in s'ormina
sos ammentos,
frores de archimissu e de puleu,
alientos d'armidda e neulaghe.
Sas reinas de domo,
Mamas, chi madrigades
su pan'e orzu cun sos bermisiones,
e cun manos fadadas
filades lana e linu
e poi las tessides a furesi
e candidas camisas e lentolos.
Lagrimas e risittos
faghen sos tintilligos a sa sorte
dande suores frittos de fadigas
chi a sero tramuntana
lassendeche in s'iscuru
tantas preguntas senza una risposta.

Su perdonu de sa mama

Una prama, un'olia e unu laru
b'hat naschidu in su logu chi ses ruttu,
inue infustu has su terrinu assuttu
cun su sambene tou, fizu caru.

Fis de mama s'addoru e-i s'amparu
dae su primu latte chi mi has suttu,
ma una manu grae ti hat iscuttu
in sa menzus edade, frore raru.

In s'umbra 'e sos prantones est profundu
su sonnu chi dorminde ses in losa
a sa destra de Deus babbu `onu,

chi cun sa manu sua poderosa
paghe cuncedat a tottu su mundu
e a chie t'hat mortu, su perdonu.